

Ezekiel

Un di e bukinan di Beibel ménos lesá, ménos studíá, ménos komprendé ta e buki di Ezekiel. Ezekiel ta un profeta hopi mal komprendé. Algun ta yam'é e profeta mas straño di Beibel. Jerome a yama e buki di Ezekiel: “un laman i laberinto di e misterionan di Dios”.

Dios a laga Babilonia konkistá i destruí Jerusalèm i e tèmpe, i deportá Su pueblo komo kastigu pa nan piká. Ma E no a stòp di traha den nan bida. Siendo den eksilio, Dios a sigui papia ku nan pa medio di Su profetan. E tabata ke kita nan for di idolatria pa nan ador'E so. Pa hasi esei, nan mester tende mas di Su mensahe.

Komo resultado di e kaptivitat, algun hudiu a repentí i bolbe na Dios. Maske hopi hudiu a bandoná Dios, e tempu di eksilio a purifiká e hudionan di idolatria. En general, nan a siña nan lès. Segun historia, nunca mas hudionan a adorá ídolonan.

E idolatria ku Ezekiel a mira na Jerusalèm promé ku el a wòrdu deportá, tabata e mésun kondishon ku el a enfrentá den kaptivitat serka e hudionan na Babilonia. E promé katibunan hudiu no a repentí. Nan no a kere ku Dios a duna Babilonia poder riba henter e mundu konosí di e tempu ei. Nan no a kere ku Babilonia lo destruí Jerusalèm. Pesei, Ezekiel na Babilonia i Jeremias na Jerusalèm a mustra ku nan kreensianan i speransa di liberashon no tabatin base.

Era di eksilio ta komienso di e reiligon di Judaísmo. Komo ku Ezekiel tabata e profeta prominente di e era aki, tin bes e ta yamá “tata di Judaísmo”.

I. OUTOR DI E BUKI

Ezekiel na idioma hebreo ta YEHEZKEL, nifikando “Dios ta fortifiká” òf “fortalesé pa medio di Dios”. Ezekiel di bèrdat tabata un fòrti fuerte pa hende derotá. Dios tambe a hasié duru pa risití e oposishon di e pueblo di Dios rebelde (3:8-9).

Ezekiel a duna diferente pida di informashon ku nos por haña un tiki bista di su bida. Probabelmente Ezekiel a laga sa su edat den 1:1 (“den e di 30 aña”). Si esei tabata su edat na aña 593 B.C., el a nase na aña 623 B.C. durante reino di bon rei Josias. E lo tabatin dos aña ora e buki di lei a wòrdu deskubrí den tèmpe na 621 B.C. inisiando Josias su reformashonnan.

Meskos ku Jeremias i Zakarias, Ezekiel a nase den famia di saserdotenan, talbes un desendiente di Sadòk (40:46; 44:15). Nòmber di su tata tabata Buzi (1:3).

Ora Ezekiel tabatin mas òf menos 18 aña (605 B.C.), Babilonia a invadí Juda i a bai ku rehén. Daniel, Ananias, Misael, i Azarias tabata algun di e katibunan (2 Reinan 24:1-3; Daniel 1:1-6). Ocho aña despues (597 B.C.), ehersito di Babilonia a regresá i atrobe a hiba katibunan na Babilonia (2 Reinan 24:10-17). Rei Joakin tabata un di esnan ku nan a hibá Babilonia. Nan tambe a bai ku e personanan mas prominente di Juda. Ezekiel tabata sufusiente “prominente” pa ser inkluí den e 10.000 rehén ku a wòrdu deportá (1:2; 33:21; 40:1). Ezekiel lo tabatin mas òf ménos 26 aña tempu ku esaki a sosodé.

Algun di e rehennan tabata enkarselá. Otronan a bira katibu. Ma hopi tabatin libertat pa biba den nan mes kas den vários kolonia di eksiliádo (Jeremias 29:1-7; Esdras 2:59; Nehemias 7:61). Ezekiel tabata un di esnan ku tabatin e libertat aki. El a biba den serkania di Tel-abib

(3:15) un di e kolonianan prinsipal di eksiliadonan lokalísá basta serka e suidat di Babilonia. Segun tradishon, Ezekiel a biba na Kifil, pegá ku Tel-abib.

Tel-abib tambe tabata lokalísá den serkania di Nippur (80 kilometer sùit di Babilonia) serka “Riu Kebar” (1:1,3; 3:15,23; 10:15,20,22; 43:3). Probabelmente riu Kebar tabata un kanal di 100 kilometer di largura ku a pasa rònt parti nort di Babilonia anto bai suit. E kanal a kuminsá na riu Eufrates na nort i a bolbe kontektá ku riu Eufrates bèk. No ta konosí, ma talbes tabata e katibunan hudiu ku a yuda koba e kanal aki. (Pusíbelmente Salmo 137:1 ta referí na riu Kebar ora e ta bisa “Banda di e riunan di Babilonia, ayanan nos tabata sinta yora...”.) Proposito di e kanal tabata pa irigashon pa e terenonan meimei di e riunan Tigris i Eufrates.

Ezekiel mes tabata un saserdote (1:3). Ma debí ku e no tabatin aksesu mas na e tèmpel na Jerusalèm (i e tèmpel tòg a keda destruí algun aña despues), e no por a traha komo saserdote na Babilonia.

Beibel no ta indiká loke Ezekiel a hasi durante e sinku aña promé ku su yamada. Nos por asumí ku el a studia Lei i otro Skritura, prediká pa su paisanonan, konsehá i yena nesesidatnan spiritual di su pueblo. Dios tabata prepará e saserdote pa ta un profeta durante e añanan ei. Destrukshon di e tèmpel lo tabata un sla hopi duru p’e. Di su perspektiva, su bida, su ministerio, su trabou... a keda destruí!

Ta interesante pa nota den buki di un saserdote ku e outor tin hopi interes den e tèmpel di Jerusalèm, leinan i ritonan. E tabata konsinete di purifikashon (4:14; 22:26) i a konosé e diferente tipo di sakrifisio i ofrendanan (42:13; 43:27; 44:29-31; 45:17; 46:20). Tambe el a mensioná ofrendanan (44:30). Su interes den e tèmpel, saserdosia i adorashon ta hopi bisto den kapítulonon 40-48.

Ezekiel a risibí su yamada di Señor pa sirbiE komo profeta (na aña 592 B.C.) sinku aña despues ku el a yega na Babilonia (1:2). Esaki a tuma lugá seis aña promé ku destrukshon di Jerusalèm. Su yamada—i loke el a eksperensia—ta komuniká den kapítulonon 1-3. E tabata un dia inolvidabel pa Ezekiel—un dia di tempestat, riba di sinku dia di e di kuater luna (yüni òf yüli). Kisas el a bai na riu Kebar pa medita ora el a mira e vishon ku a transform’é for di un saserdote pa un profeta.

Nota tambe ku su yamada a tuma lugá ora e tabatin 30 aña (1:1). Esei tabata e edat ku levitanan a inisiá nan ministerio (Numbernan 4:23,30,39,43,47). Ezekiel, siendo den e famia saserdotal, tabata yamá na e edat ei—méskos ku Jesus i Juan Boutista.

Dios a laga Ezekiel sa ku E ta mand’é komo profeta na un pueblo rebelde, kabesura i sobèrbe (2:3-8; 3:9,26-27). Su kongregashon lo no ta reseptivo pa ku su ministerio. E mester mira su ministerio komo un guardia. Un guardia ta obligá pa hasi un kos so: bati alarma. E no ta responsabel pa reakshon di hende pa ku e alarma.

Ora Israel a wòrdu konkistá i deportá dor di Asiria, poko poko nan a wòrdu asimilá den e kultura i religion di Asiria. E mésun kos lo sosodé ku e rehennan di Juda? Babilonia tabata un stat masha grandi, riku, impreshonante. E tabata un sivilisashon hopi atvansá den komersio. Tabatin preshon konstante di materialismo i paganismo riba e katibunan hudiu na Babilonia. Hopi hudiu a kompromete nan kreensianan i balornan i a disidí di keda biba na Babilonia permanente. Lidernan spiritual tabata preokupá ku e materialismo i paganismo di Babilonia lo asimilá e rehenan di Juda, i e influencia di Skritura lo kaba na nada pa ku nan. E trabou di Ezekiel entre e eksiliadonan—kisas mas ku tur otro—a yuda nan keda un pueblo distinto i mantené nan kreensia den Jehová Dios bibu!

Ezekiel tabata kasá. E tabatin un bon matrimonio. Dios a yama su esposa “e deseo di bo wowo” (24:16). No ta konosí si e tabatin yu, ni kuantu. E dia mas tristu di su bida tabata dia ku Dios a anunsiá n’é ku Jerusalèm a ser ataká (24:2); mésun dia ku su esposa a fayesé (24:15-18) na aña 587 B.C.—di nuebe aña di su kaptividad.

E profeta a bira un lider spiritual renombrá entre e hudianan den eksilio. Ku frekuensia, tantu e ansianonan komo pueblo a bin kas di Ezekiel pa konsultá kun’é (8:1; 14:1; 20:1).

Ainda Ezekiel tabata profetisá 22 aña despues di su yamada (29:17), tempu ku e tabatin 52 aña (571-570 B.C.). No ta konosí kuantu aña mas su ministerio por a dura. (E di 27 aña di 29:17 ta e di 27 aña di Joakin su eksilio.) I nada ta konosí di Ezekiel su morto, ni su edat tempu ku el a fayesé. Segun tradishon, el a muri i a wòrdu derá na Kifil, pegá ku Tel-abib.

Sin duda e tabata un hòmber spiritual. Ezekiel tabata hopi konsiente di i kontrolá pa medio di Spiritu Santu. Bes tras bes el a referí na e di tres Miembro di Trinidat (1:12,20-21; 2:2; 3:12,14,24; 8:3; 10:17; 11:1,5,24; 36:26-27; 37:1,14; 39:29; 43:5).

F.W.J. Schroder a bisa di Ezekiel: “Ezekiel ta esun, ku na promé lugá, kibrando na pida e kurasonnan duru ku e martin di lei, ta respresentá un hues severo ku no ta kambia di opinion, ma pesei, bashando remedi suave riba e heridanan habrí, ta proba ku e ta un médiko ku ta kura.”

Ezekiel tabatin selo ferviente pa Dios. E ta persistente den su esfuerso pa mantené Dios i Su kousa na haltu. E tabata kategórikamente den su konvikshonnan fundamental ku el a ekspresá ku siertidat. Dios a hasi Ezekiel un profeta fuerte i sin miedu (3:8-9). E tabatin hopi energia.

El a gusta loke ta simpel, komprendíbel i dirèkt. El a pensa bon. El a skirbi na un manera komprendíbel. Su buki ta indiká ku e tabata un hòmber metódiko, artístiko i místiko.

E profeta tabata un hòmber praktiko. E ta yamá “e profeta di responsabilidat personal.” El a sòru pa e mes apliká Dios Su mensahe, i a lucha pa su paisanonan tambe aplik’é.

Tono di su predikashi tabata duru i impresivo. Konstantemente el a enfatisá e soberania i gloria di Dios. Ezekiel a mensioná e “gloria di Señor” (òf un frase similar) rípidamente den e promé 11 kapitùlo. Tambe e frase “Nan lo sa ku Ami ta SEÑOR” (òf algu similar) ta aparesé den e buki 63 bes.

I ta interesant ku maske su mensahe tabata dirigí spesífikamente pa ku pueblo di Dios, Ezekiel tabata bon na haltura di loke tabata pasa na otro parti di mundu. Den kapitùlonan 25-32, e profeta a papia di Amon, Moab, Edòm, Filistia, Tiro, Sidon i Egipto. Tur e nashonnan aki tabata lokalísá den serkania di e nashon hudiu. Kòrda ku Ezekiel a biba leu for di nan, na Babilonia. Di un òf otro manera, el a keda na haltura kiko ta pasando na e paisnan ei.

II. LEKTORNAN DI E BUKI

Manera nos a mira ya kaba, Ezekiel a profetisá spesífikamente pa e eksiliadonan di Juda. Hopi di su palabranan tambe tabata dirigí na e hudiunan ku ainda tabata biba na Juda, maske e mes tabata na Babilonia. I tambe ta bon pa mensioná ku e buki ta kontené proklamashonnan pa ku nashonnan pagano (kapitùlonan 25-37).

III. FECHA DI E BUKI

Ku eksepshon di Hageo i Zakarias, ningun otro buki profétiko ta duna tantu informashon tokante fechanan manera buki di Ezekiel. Nos ta lista e fechanan ku el a duna aki:

MENSAHE	TEKSTO	FECHA	MENSAHE	TEKSTO	FECHA
Vishon di Ezekiel	1:1-3	yüni 593	Huisio pa Egipto	29:17	apr 571
Yamada komo guardia	3:16	yüni 593	Huisio pa Egipto	30:20	apr 587
Vishon di tèmpel	8:1	oug/sèp 592	Huisio pa Egipto	31:1	yün 587
Diskurso ku ansianonan	20:1	oug 591	Lamento pa farao	32:1	mar 585
Di dos atake kontra Jerusalèm	24:1	yan 588	Lamento pa Egipto	32:17	apr 586
Huisio pa Tiro	26:1	mar/apr 587/586	Kaída di Jersualèm	33:21	des/yan 586/585
Huisio pa Egipto	29:1	yan 587	Vishon di tèmpel nobo	40:1	apr 573

Pues, por ripará ku kapítulonon 1-24 ta fechá entre año 593-588 B.C. Den e sekshon ei Ezekiel a profetisá e destrukshon di Jerusalèm. Kapítulonon 25-32 en general tin un fecha entre añanan 587-585 B.C.—ku eksepsion di 29:17. Sin duda e mensahe aki tabata inkluí den e sekshon aki pasobra e ta kuadra ku e otro mensahenan di huisio kontra Egipto. I kapítulonon 33-48 ta fechá entre 585-573 B.C., profetisando e restorashon di e pueblo di Dios.

Ezekiel su ministerio a dura por lo ménos 22 año (593 – 571 B.C.). Talbes el a kontinuá su ministerio mas año despues di su último profesia (29:17-21). Algun estudiante di Beibel ta di opinion ku su ministerio a kontinuá te año 559 B.C. Ma e echu ku Ezekiel no a mensioná ku rei Joakin a haña su libertat (na año 562 B.C.) por indiká ku el a skirbi e buki promé ku e evento ei a tuma lugá. Di tur manera, contenido di e buki ta kubri un periodo di 22 año so.

IV. PROPOSITO PA E BUKI

E motibunon ku Ezekiel a skirbi e buki ta bisto:

A. Pa mostra ku e kaída di Jerusalèm i e eksilio na Babilonia ta Dios Su medida nesario pa korigí e desobedensia di Su pueblo i prevení nan di desvia por kompleto i permanente for di Dios. Prinsipalmente kapítulonon 1-24 ta enfatisá esaki.

B. Despues di e destrukshon di Jerusalèm, Ezekiel a dirigí su atenshon pa ku nashonnan pagano pa laga nan sa ku nan mes huisio ta na kaminda. Por haña e énfasis aki den kapítulonon 25-32.

C. Pa konsolá pueblo di Dios dor di laga sa ku dia ta bin ku Dios lo restorá e restante hudiu ku ta repentí i lo establese nan den un teokrasia glorioso futuro ku nan propio rei. Nan lo adorá e úniko Dios bèrdadero na su tèmpepel rekonstruí. Esaki ta e mensahe prinsipal di kapítulonon 33-48.

V. STRUKTURA I KONTENIDO DI E BUKI

Por bisa ku henter e buki ta lora rònt di e kaída di Jerusalèm. Promé ku 33:21 (“e stat a wòrdu konkistá”), Ezekiel a proklamá ku e stat lo wòrdu destruí. Despues di 33:21, Ezekiel a kambia su mensahe pa prediká ku e stat lo wòrdu restorá. Pues, por bisa ku en general e kapítulonon promé ku 33:21 ta mensahenan promé ku kaída di Jersualèm i e kapítulonon despues di e teksto ei ta skirbí despues di e evento horroso ei.

Pa ser mas eksakto, den e promé sekshon, por nota un diferensia despues di 24:2 (“awe mes rei di Babilonia a rondoná Jerusalèm”). En general kapítulonon 25-32 tabata skirbí durante e atake kontra Jerusalèm.

Nota un skema di e buki:

I. E PROFETA SU YAMADA – 1-3

II. PROFESIANAN KONTRA JUDA PROMÉ KU KAÍDA DI JERUSALÈM – 4-24

A. Pronostikashon di huisio di Jerusalèm – 4-7

B. Motibunon pa huisio di Jerusalèm – 8-11

C. Siertedat di huisio di Jerusalèm – 12-19

D. Rektitut di huisio di Jerusalèm – 20-24

III. PROFESIANAN KONTRA E NASHONNAN PAGANO – 25-32

E sekshon aki ta mostra ku otro nashonnan ku Dios tambe lo husgá. Ezekiel a proklamá ku Dios ta bai huzga Juda. Ma e tambe ta laga sa ku Dios lo huzga nashonnan pagano. E huisionan pa paisnan pagano ta demonstrá dos punto: 1) Lo tin kastigu pa paisnan malbado i 2) Paisnan malbado lo no prevení redenshon i restorashon di Dios Su pueblo skohí.

A. Huisio pa ku Amon – 25:1-7

B. Huisio pa ku Moab – 25:8-11

C. Huisio pa ku Edom – 25:12-14

D. Huisio pa ku Filistea – 25:15-17

E. Huisio pa ku Tiro – 26:1 – 28:19

F. Huisio pa ku Sidon – 28:20-26

G. Huisio pa ku Egipto – 29:1 – 32:32

IV. PROFESIANAN DI REKONSTRUKSHON I RESTORASHON DESPUES DI KAÍDA – 33-48

Ezekiel su predikashi den e sekshon aki ta enfatisá speransa i konsuelo pa ku futuro.

A. Fasenan di preparashon pa e reino nobo – 33-39

1. Responsabilidadat di profeta i pueblo – 33
2. Wardadónan falsu lo ta remplasá pa e bèrdadero Wardadó – 34
3. Regreso i revivamentu di Israel katibu – 35-37
4. Destrukshon di nashonnan malbado (Gog i otronan) den futuro – 38-39

B. Adorashon den e reino nobo – 40-48

1. Tèmpel di milenio – 40-43
2. Adorashon durante milenio – 44-46
3. Tera i riu den milenio – 47-48

Manera algun otro profeta, Ezekiel a risibí un vishon di Dios ku a pone riba su kara na suela dilanti Dios (1:26-28; Isaias 6; Revelashon 1:10-18). Ora nos ta kompará e tres vishon aki di Dios (di Ezekiel, Isaias i Juan), nos por mira ku algu distínto a impreshoná nan. Isaias a keda baboká ku e santidat di Dios. Pa Ezekiel, e poder, mahestat i soberania di Dios a destaká. I pa apòstel Juan, tabata e amor di Dios ku a impreshon’é. Den tur tres kaso ku nan a mira Señor, e efekto tabata identiko: nan a umiyá nan Su dilanti

Ta interesante pa studia e buki Ezekiel mirando e gloria di Dios. Kapítulonon 1-3 ta papia di e gloria selestial ku tabata na e tèmpel di Jerusalèm (1:28; 2:12; 3:23; 8:4). Ma pa motibu di piká, e gloria di Dios a bai poko poko. E a sali bai na entrada di tèmpel (9:3; 10:4), bai para ofer di e kerubinan (10:18), yega na porta di stat pariba (10:19), para na Seru di Oleifi, manera e ta yama ayo na e stat (11:22-23). E gloria di Dios anto ta ousente pa mayoria parti di kapítulonon 4-39. No ta te e último vishon di Ezekiel (kapítulonon 40-48) ku e gloria di Dios ku a bai, porfin ta regresá i ta yena e tèmpel restorá (43:2,4-5; 44:4).

Kòrda ku e gloria a bai pa motibu di piká. Igualmente, nos por hasi Spiritu Santu di Dios tristu ku nos desobedensia (Efesionan 4:30) i e gloria di Dios ta bandoná nos bida.

Un di e preguntanan ku e sufrimentu di pueblo di Dios a okashoná tabata: “Pakiko nos ta sufri?” Algun a haña ku Dios tabata inhustu, ku nan ta sufri komo resultado di piká di nan antepasadonan. Nan tabatin un proverbio ku a ekspresá esaki: “E tatanan ta kome drùif zür, ma djente di e yunan ta kohe rel” (18:2). Den otro palabra, “Nos ta inosente. No ta nos piká ku ta e kousa di nos sufrimentu. Ta falta di e generashonnan anterior.” Den kapítulo 18, Ezekiel a purba korigí e pensamentu eronio. El a mostra ku kada generashon i kada persona ta responsabel pa nan mes piká. El a deklará bon kla, “E alma ku peka lo muri” (18:4,20). El a mostra ku nan ta meresé loke nan ta sufri.

E hudiunan na Juda a pretendé ku esnan ku a wòrdu kapturá i hibá na Babilonia tabata esnan mas malbado; esta ku Dios a trasportá e pekadornan mas grandi pa Babilonia. Ma tantu Jeremias komo Ezekiel a laga sa ku Dios a protehá e rektonan di Juda for di Su huisio dor di hiba nan Babilonia. Maske e pueblo hudiu den kaptividat hopi biaha no tabata sensible pa ku Dios, e malbadonan real tabata esnan ku a keda na Juda!

Den e mensahenan den kapítulonon 4-24, Ezekiel a enfatisá e piká i inkredulidat di pueblo di Juda, i e konsekuente huisio di Dios. Ma e profeta tambe a kondená e pikánan di e pueblo hudiu den kaptividat. Ezekiel a pinta e pueblo hudiu na Jerusalèm komo un mata di wendrùif ku no ta sirbi...ku ta sirbi solamente pa kandela (15). Ma igualmente rípidamente el a yama e hudiunan den eksilio ku “kas rebelde” (2:5,6,8; 3:9,26,27; èts.), i tambe “kadushi i mata di sumpiña” i “skòrpion” (2:6). Nan a konsiderá Ezekiel komo un bunita kantika—nan a gusta skuch’é ma no ke apliká su mensahe (33:32).

Ezekiel a papia di dos tipo di restorashon pa pueblo di Dios. Pa di promé, Israel lo ta restorá geográficamente i políticamente bèk den nan tera. Dios lo trese bèk esnan ku El a plama (34:11-16,25-30; 37:24-28; 38:8,16; 39:25-29). Despues lo sigui restorashon spiritual.

Na komienso di su ministerio, Ezekiel a haña un vishon di Dios glorioso ku ta reina na shelu. Anto el a mira e gloria di Dios bandoná Israel pa motibu di nan piká. Ezekiel mester a anunsiá ku Jerusalèm lo wòrdu destruí.

Ma despues di e destrukshon di Jerusalèm, Ezekiel a anunsiá e restorashon di pueblo di Dios. Despues di 70 aña di eksilio, un restante di un generashon nobo di Israel lo bolbe na su tera, e tèmpel lo wòrdu re-konstruí i e gloria di Señor lo bolbe.

Ma mayoria di e profesia aki den kapítulonnan 37-48 ta referí na eventonan ku tin ku tuma lugá den futuro ainda, tratando ku e resurekshon futuro di Israel ku establesementu di Milenio, ora Kristo lo sinta riba trono di David. Tur e promesanan lo wòrdu kumplí den Israel su Mesias, Hesu-Kristo

Den Ezekiel su kontakto ku hudiunan den eksilio, el a purba kita nan speransa falsu ku nan lo regresá bèk na e Tera Primintí den korto tempu. Promé ku e babilonianan a kapturá Jerusalèm, e tambe a prepará nan pa destrukshon di nan suidat stimá.

Maske e 70 aña di eksilio tabata difísil pa e pueblo hudiu, nan tabata añanan di gran benefisio pa nan. Nan a siña ku Dios ta santu i ku piká eventualmente lo wòrdu kastigá. Ademas, e periodo di tempu aki a kura e nashon hudiu di nan tendensia pa bai tras di idolatria. Nan a regresá na nan mes pais ku un amor nobo pa Skritura, un pueblo spiritualmente mas fuerte.

Kapítulonnan 40-48 ta informashon tokante e tèmpel durante Mileño—e reino di mil aña di e Mesias. Tin hopi detaye den e sekshon aki. Ma básikamente e ta komuniká ku Mesias lo ta adorá na kapital di e reino, Jerusalèm.

Por tin pregunta tokante e sakrifisionan ku entre otro 40:38-44 ta mensioná, pasobra solamente e sanger di Kristo por kita piká i no ta nesesario pa hasi sakrifisio mas (Hebreonan 10:10-14). Pusibelmente e sakrifisionan ta—méskos ku otro detaye den e kapítulonnan aki—ta simbólico. Ma otro estudiante di Beibel ta pensa ku e sakrifisionan lo sirbi no komo un medio pa kubri piká, sino komo un rekordatorio di e gran sakrifisio di Kristo riba.

VI. OPSERVASHONNAN DI E BUKI

A. STAIL DI SKIRBI DI EZEKIEL

Ta bisto ku e outor tabatin un plan bon pensá pa e buki. Ezekiel tabata un bon eskritor i a skirbi kla. E tabatin un stail metódiko den manera ku el a organisá e buki.

Ezekiel ta un di e profetanen ku ta mihó dokumentá pa ku fechanan. Ta parse ku Ezekiel tabatin un hábito pa skirbi eventonan i fechanan. Por nota esaki espesialmente relashoná ku e mensahenan ku el a risibí di Dios. En general, nan ta den òrdu kronológiko. Nos a mira kaba kon frekuente el a pone fecha pa su mensahenan (1:1-2; 3:16; 8:1; 20:1; 24:1; 26:1; 29:1,17; 30:20; 31:1; 32:1,17; 33:21; 40:1). Ta parse kapítulonnan 1-32 ta kubri un periodo di shete aña di profesia di Ezekiel. Kapítulonnan 33-48 ta kubri un periodo di 15 aña di predikashi di Ezekiel.

No tin duda ku Ezekiel su stail di skirbi tabata riba un nivel haltu. El a hasi uso di hopi diferente método pa komuniká e bèrdat revelá n'è. El a hasi interogante ku frekuensia: “Yu di hende, bo ta mira kiko nan ta hasi?” (8:6). Provèrbionan ta aparesé den e buki: “E tatanan ta kome drùif zür, ma djente di e yunan ta kohe rel” (18:2). “Manera e mama ta, asina e yu muhé tambe ta” (16:44). Su buki ta yen di vishon, parabola i alegoria (17; 19; 23; 24; 27; 37:1-14). Tambe tin charada (15). El a usa aktonan simbólico i komedia pa hala atenshon di un pueblo ku kurason duru pa motibu di piká (4-5; 12:1-7; 24:1-14; 37:15-23). E profeta a komuniká ku storianan dramátiko, ilustrá pa su storianan di prostitushon (16,23). Ezekiel a kombiná un stail di skirbi masha normal huntu ku lamentonan i poesia (p.e. 19:1-14; 26:15-18; 27:1-36; 30:1-4; 32:1-21) pa forma un obra maestral. E tambe a hasi uso di símbolonan ku ta difísil pa interpretá.

Nos lo sigui elaborá riba algun manera ku Ezekiel a komuniká:

B. AKSHON SIMBÓLIKO I KOMEDIA

Mas ku tur otro profeta, Ezekiel a siña dor di akshon simbóliko, komedia i alegoria. Dios a bis'é pa hasi kos straño, pa Su mensahe hasi un impakto visual riba e hendenan. Dios a bisa Ezekiel, “Mi a hasibo un señal pa e kas di Israel” (12:6). Algun di e kosnan ku Dios a bis'é pa hasi lo mester tabata hopi difísil p’e, pasobra tin bes el a hasi su mes ridíkulo. Kontinuamente el a eksponé su mes na e chèrchi di hende pa e por komuniká ku nan.

Motibu pa e akshonnan simbóliko ta pasobra e hendenan no a skucha palabra di Dios. Pesei, na lugá di papia su mensahe, el a komuniká e mensahe dor di drama. “Esaki ta un señal pa e kas di Israel” (4:3). I e aktonan simbóliko a produsí e efekto deseá, por lo ménos riba esnan ku kurason habrí. Nan a hasi pregunta kiko ke men ku loke el a hasi (12:9; 24:19; 37:18). Esei a bira su oportunitat pa splika e importansia di su akshon i apliká su mensahe. Nota Ezekiel su akshonnan simbóliko:

AKSHON SIMBÓLIKO	SIÑANSA	TEKSTO
Señal di e klenku	Atake i kaída di Jerusalèm	4:1-3
Señal di e profeta su postura	Inkomodidat di kaptividat	4:4-8
Señal di tempu di hamber	Skarsedat durante kaptividat	4:9-17
Señal di spada i nabaha	Destrukshon kompletu di stat	5:1-17
Señal di muda di kas	Deportashon pa otro pais	12:1-7,17-20
Señal di spada skèrpi	Huisio inminente	21:1-17
Señal di spada di Nabukodonosor	Babilonia e konkistadó	21:18-23
Señal di fòrnu	Huisio i purifikashon	22:17-31
Señal di morto di esposa	Bendishon pèrdí	24:15-27
Señal di 2 palu	Reunifikashon di Israel i Juda	37:15-17

C. ALEGORIA

Alegorianan den Beibel ta storianan ku tin e meta pa sína lèsnan spiritual. Pues, e akshonnan simbóliko i e alegorianan den e buki di Ezekiel ta sirbi e mésun proposito. E diferensia entre un alegoria i akshonnan simbóliko ta ku un akshon simbóliko ta siña dor di un akshon òf evento. Alegorianan en kontraste ta instruí dor di palabranan. Nota diferente alegoria den buki di Ezekiel: a) E mata di wendrùif (15:1-8); b) e beibi ku a bira un esposa infiel (16:1-63); c) e dos águila (17:1-21); d) e palu di seda (17:22-24); e) e dos muhé (23:1-49); f) e wea ku ta herebé (24:1-14).

Ezekiel a pinta Jerusalèm i Samaria komo prostitutan (23:2-3); prensnan di Israel komo leon (19:1-9) i mata di wendrùif (19:10-14) òf un palu (17:1-8); e kaldeonan komo un águila (17:3); Asiria komo un palu di seda (31:3); Egipto komo un “monster den laman” (32:2).

D. VISHONNAN

Un vishon den Beibel ta un eksperensia milagroso pa ku un hòmber di Dios na un okashon spesial, ora Dios a revelá bèrdad n’é na un forma visual òf oudibel. Tin tur klase di vishon, variando den largura, intensidat, kantidat di símbolo, mirá den spiritu (p.e. den un soño) òf ku bista mes.

Ezekiel ta konosí komo “e profeta di vishonnan”. Algun di su vishonnan ta hopi detayá (p.e. 1:4-28).

E buki ta habri ku “e shelunan a habri i mi a mira vishonnan di Dios” (1:1). Nota e vishonnan den buki di Ezekiel: a) vishon di kerubim (vishon di Dios)—Ezekiel su promé vishon (1:4-28); b) vishon di ròl (2:9 - 3:3); c) vishon di sabana (3:22-23); d) vishon di wesunan seku (37:1-10); e) vishonnan di tèmpel nobo i esenan asosiá (40:1 - 48:35). Tambe tin kuater vishon di Jerusalèm: I) kuater abominashon den tèmpel (8:1-18); II) habitantenan matá (9:1-11); III) siudat destruí pa kandela (10:1-22); i IV) Señor ta bai for di e stat (11:1-25).

E. OTRO PROFETA I EZEKIEL

Tantu Isaias komo Jeremias tabata profetanan di Juda ku a profetisá pa pueblo di Juda lokalísá na Juda. Ma Ezekiel ta diferente. Maske e tabata un profeta di Juda i el a profetisá pa pueblo di Juda, ni Ezekiel ni su pueblo tabata biba na Juda. Ezekiel tabata un hóben bibando na Juda tempu ku el a wòrdu kapturá i hibá pa Babilonia. Tabata na Babilonia ku el a risibí su yamada pa ta un profeta. Tabata na Babilonia ku el a profetisá pa e pueblo di Juda ku tambe tabata den eksilio na Babilonia.

Ezekiel i Jeremias a profetisá mas òf ménos e mésun tempu. Ma Jeremias tabata na Jerusalèm mientras Ezekiel tabata huntu ku e rehénnan den eksilio na Babilonia. Tur dos a profetisá tantu promé ku kaída di Jerusalèm komo despues. Probabelmente Jeremias tabata mas òf ménos 20 aña mas grandi ku Ezekiel.

Por bisa ku e mensahe di Ezekiel i Jeremias tabata hopi similar, maske nan tabata skirbí for di diferente sitio. Hopi di loke Ezekiel a bisa ta e mésun mensahe ku Jeremias a prediká. Tur dos a kondená apostasia, aliansanan ku nashonnan pagano, idolatria, profetanan falsu ku tabata gaña pueblo di Dios, èts. Kòrda ku tantu Jeremias komo Ezekiel tabata di famia saserdotal. Pues nos por bisa ku sin duda Ezekiel a yega di tende Jeremias prediká hopi biaha na Jerusalèm promé ku el a wòrdu kapturá i hibá den eksilio. Pusíbelmente Ezekiel tabata un alumno di Jeremias. Tin studiante di Beibel ku ta bisa ku Ezekiel tabata “e prolongashon di e stèm di Jeremias”.

Jeremias a manda un karta pa esnan deportá (Jeremias 29). E karta di Jeremias a komprobá loke Ezekiel tabata prediká. Pusíbelmente Jeremias i Ezekiel tabatin kontakto relashoná ku e karta aki.

Ezekiel lo tabatin kontakto ku un otro profeta: Daniel. Daniel lo tabata mas serka edat di Ezekiel, talbes solamente algun aña mas hóben. Ta notabel ku ni Ezekiel ni Daniel a wòrdu yamá pa ta profeta te despues ku nan tabata den eksilio na Babilonia. Nan tabata profetanan solamente durante e era di kaptividat.

No tin duda ku Ezekiel tabata sa di Daniel (14:14,20; 28:3). Ta probabel ku nan a konosé otro i asta por tabatin amistad ku otro.

Ora Ezekiel a yega Babilonia, e lo a tende di e hóben hudiu ku tabatin un puesto haltu. Esaki lo a sorprendé. Kon ta pusíbel ku un hudiu di su mes edat por yega na un puesto tan haltu asina lihé sin komprometé su prinsipionan i konvikshonnan. Sin duda Ezekiel lo a studia Daniel di tur ángulo. Asta e por tabata yalurs di Daniel su puesto.

Ma Ezekiel a pone tur sintimentu di yalusí un banda i a yega na konklushon di Daniel tabata un hòmer hopi spiritual. Den 14:14,20 Ezekiel a menta nòmber di Daniel dos biaha ku ningun klase di amargura. E teksto aki ta papia di e piká horíbel di Jerusalèm i ta bisa, “maske e tres hòmbernan aki: Noe, Daniel i Jòb tabata ayanan (na Jerusalèm), nan lo por a libra solamente nan mes dor di nan hustisia”. Ezekiel a selektá tres hòmer hopi hustu. Nos por komprendé e motibu ku e lo a selektá Noe “un hòmer hustu, perfekto den su generashonnan” (Génesis 6:9) i Jòb, un hòmer “perfekto i rekto” (Jòb 1:1). Ma ta remarkabel ku el a ignorá Abraham, Samuel, òf David i a selektá Daniel, un hòmer di Ezekiel su mes edat ku un puesto haltu. Ta opvio ku Ezekiel a permití ningun pensamentu di yalusi venená su aktitut. Alkontrario, el a aploudí Daniel altamente dunando e un onor tan grandi. (Klaramente esaki tambe ta demonstrá kla ku Daniel tabata un hòmer hopi respetá i atmirá pa su bida spiritual.)

F. TÓPIKONAN IMPORTANTE DI EZEKIEL

Diferente atributo di Dios ta destaká den e buki: Dios Su soberania, santidat, hustisia, misericòrdia, gloria...i nòmber. Ezekiel tabata ke mustra e hustisia di Dios kastigando Juda pa su pikánan.

Ezekiel ta mustra ku hende tin kurason pekaminoso i ta individualmente responsabel. Relashoná pa ku Israel, e ta un pueblo di idolatria ku ta kosechá Dios Su huisio. Ma e tambe ta un nashon skohí i tin speransa glorioso p’é. Den último dianan e reino lo ta restorá. Pa ku nashonnan pagano, Ezekiel tambe a laga sa di nan responsabilidat i huisio binidero.

G. PALABRANAN IMPORTANTE DI EZEKIEL

E palabranan “yu di hende” ta usá 93 biaha den e buki. Dios a referí na Ezekiel ku e nòmber aki. Esaki tabata Ezekiel su manera pa identifiká su mes ku e pueblo pa ken Dios a mand’é—meskos ku Hesus a hasi. Ezekiel ta yamá “e otro yu di hende”. Ma tambe e palabranan aki ta muestra un distinshon entre Dios i Ezekiel, enfatisando e orígen divino di e mensahe en kontraste di e mensahero humano. Pues di e forma aki, Ezekiel a pone énfasis riba e echu ku loke el a proklamá ta nada ménos ku Palabra di Dios.

E frase “nan lo sa ku Ami ta SEÑOR” tambe ta aparesé 90 piku biaha den e buki (ma ningun biaha den kapitulonon 40-48). Esaki ta enfatisá e echu ku Dios ta Señor i E ta soberano riba e sirkunstansianan i futuro di pueblo di Dios i nashonnan pagano. E frase ta un rekordatorio kontinuo ku Señor soberano lo hasi loke El a bisa.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 376-384.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 7-47.
- Benware, Paul N., *Survey of the Old Testament* (Chicago; Moody Press, 1988), p. 222-225.
- Demaray, Donald E., *A Layman’s Guide to Our Bible* (Los Angeles: Cowman Publishing Company, 1964), p. 106-107.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 79.
- Freeman, Hobart E., *An Introduction to the Old Testament Prophets* (Chicago: Moody Press, 1972), p. 295-325.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 339-348.
- Jensen, Irving L., *Jensen’s Survey of the Old Testament* (Chicago: Moody Bible Institut, 1978), p. 358-373.
- McGee, J. Vernon, *Thru the Bible* notes, p. 234-235.
- Mears, Henrietta C., *What the Bible is All About* (Minneapolis: World Wide Publications, 1966), p. 241-256.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 142-150.
- Ridall, R.C., Tenney, Merrill C., ed, *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 1, p. 784-785. “Chebar”
- Wiersbe, Warren W., Ezekiel, *Expository Outlines on the Old Testament*, (Convington, Kentucky: Calvary Baptist Church, March 1973).
- Wood, Leon J., *The Prophets of Israel* (Grand Rapids: Baker Book House, 1979), p. 355-362.